

Regional News Unit AIR Aizawl
Friday, January 24, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh te vawiin hian endik a ni ang.
- Mizoram Truck Owners Association (MTOA) leh Mizoram Truck Drivers Association (MTDA) chuan Vairengte leh Sairang inkar National Highway kawng chhia avangin vawiin a ni 2 nan an ding zui.
- Chief Election Commissioner Rajiv Kumar chuan Election buaipuitute chu thudik lo thehdarh leh internet lama inbumna do tura ruahmanna tha siam turin a chah
- Maharastra-a Jalgaon district-a rel chesuala thi zat chu 13 an tling tawh.

<><><>

VC/LC ELECTION

Mizoram District 9-a Village Council leh Aizawl Municipal Corporation leh Lunglei Municipal Council huamchhunga Local Council inthlan a chuh tumte tan hming pek luh te chu vawiin ah endik a ni ang.

He inthlana chuh ttumte hming pekluh hun chu nimin khan khar a ni a, vawiin chawhma dar 11 atanga endik tan a ni anga, inhnukdawk duh te tan karleh thawhtanni chawhnu dar 3 thleng hun hawn a ni ang.

Aizawl, Lunglei, Champhai, Serchhip, Mamit, Kolasib, Saitual, Khawzawl leh Hnahthial District bakah Aizawl Municipal Corporation leh Lunglei Municipal Council huamchhunga Local Council-ah te thla thar ni 12 ah inthlan neih a ni anga, vote hi chhiar nghal a ni ang.

Lunglei Dist a VC khaw 88 leh Local Council 148 awmna a chuh tur candidate te hming pekluh tawpni anih angin nimin khan Candidate te chuan an hming an ziak lut fel. Thudawn danin Lunglei South bial Sailen khuaah chuan Congress party chu chuhtu an awm lova ni.

Lungleiah hian Pol.party 3:ZPM, INC leh MNF te chuan a hrang theuhin an chuh deuh vek a, Lunglei khawpui LMC area ah chuan ni za inhlawhna awm ta lo, Buhfai man to, kawngpui chhia leh LMC awm tak avanga nunphung danglam ta chungchang te au hla ber pakhat a niin VC term pawh tawi leh Lunglei HPC thiah tumna awm ni a lang chu ZPM sorkar an beihna a ni ber a, sawhthing lei an harsat dawn vangin sorkar in inthlanna a buatsaih tih te leh sikul naupang exam dawn hnaihah inthlanna buatsaih a ni chu zirlaite ngaihsaklohna a ni ti ten Sorkar an dem a ni.

Hetihlai hian Rorellai ZPM chuan thlai thar lei anih dawn thu leh sorkar in kum 1 na a hmang zo ta a, a tak takin hma a la thei dawn ta a, mipui beiseina atakin a thleng dawn tan tiin an sawi ve thung a ni.

<><><>

APEDA

Agricultural and Processed Food Products Export Development Authority (APEDA) bultumin thlai thar state pawna thawnchhuah hmaa sawngbawl dan tur zirho na nimin khan Aijal Club-ah neih a ni.

Workshop hi Prof. Dr. N. C. Saha, Chairman, Foundation for Innovative Packaging and Sustainability (FIPS) chuan a kaihruaia. Pi Ramdiniani, Secretary Agriculture & Farmer's Welfare leh Horticulture Department chuan he hun hi a hmanpui a ni.

Pi Ramdiniani chuan kalkhawmte fuihna leh duhsakna hlanin Mizoram atanga thlai thar thawnchhuah hmaa sawngbawl leh vawn that dan inzirtirna mumal taka neih chho a ni chu lawmawm a tih thu sawiin, workshop booklet a tlangzarh nghal a ni.

Additional Director of Horticulture Pu L. Lalhmingmawia chuan Mizoram atanga thlai thawnchhuah chungchangte leh sawngbawl that a tulzia sawi zauna a nei a, mi thiam rual hnen atangin hmarcha, aieng, sawhthing leh anthurium pangpar enkawl leh sawngbawl dan zirtirna ngaihthlak niin zawhna leh chhanna hun te hman a ni.

Workshop hi APEDA Agricultural and Processed Food Products Export Development Authority bul tumin Department of Commerce, Ministry of Commerce and Industry leh Mizoram Horticulture Department nen tangkawpin buatsaih a ni.

<><><>

BBBP

Serchhip ICDS Project huaihawtin National Girl Child Day leh BBBP Scheme kum 10 tlin lawmna pualin nimin khan kawng zawh a ni a. Thupui atan Walk for the girl child hman a ni.

He hunah hian Pi Caryll Lalpari, Serchhip CDPO chuan, National Girl Child Day hi kumtin January ni 24 ah lawm thin a nih thu a sawi a. Kuminah hian hemi pual mai bakah BBBP Scheme kum 10 tlin lawmna ni bawkin a thil tumte kan chian leh zual nan block levelah hun hman tura tih a nih thu a sawi. Anganwadi Centre tinah thutiam sawi niin, tree plantation campaign neih a nih tur thu a sawi a ni.

Poshan Coordinator Pi Lalnundiki Ralte kaihhruaiin hmeichhe naupang humhim tura intiamna sawi rual a ni a. Kawng zawhah hian WCD hnuiaia office hrang hrang- DPO Office, OSC, Shakti Sadan leh Anganwadi Worker leh Helper te leh DCPU Office staff te an tel a ni.

Mamit District, Women & Child Development leh Education Department hnuiaia District Hub for Empowerment of Women chuan Hmeichhe Naupangte ni (National Girl Child Day) pualin nimin vek khan High School hmeichhe naupangte tan ni khat awh volleyball inelna an buatsaih.

He inelna hi hmeichhiate infiamna kawnga hma an sawn zelna tura buatsaih niin, kawngzawhna leh aurualna neih nghal bawk. Inelna ah hian pakhatna Govt Mamit HS-II, pahnihna New Mamit High School, pathumna Presbyterian English School, palina Govt. Mamit High School te an ni. Lalrindiki, Govt. Mamit High School-II-in Player tha ber lawmman a dawng bawk.

<><><>

TRUCK OWNER ASSN

Mizoram Truck Owners Association (MTOA) leh Mizoram Truck Drivers Association (MTDA) te chuan Vairengte leh Sairang inkar National Highway kawng chhia avangin vawiin a ni 2 na ah an ding chhonzawm a

MTOA Secretary Pu Dina Tlau chuan nimin chawhma khan PWD Minister hova kawng chhe zual siamthat ngai tura ngaipawimawh hmasak te sawiho a nih thu sawiin sorkar ah pawh beiseina sang tak an neih thu a sawi a, kawng hi zawh tlaka siam a nih hma loh chuan tlan an tumloh thu sawiin pawl 2 te hmalakna hi mipui ten an thlawp tha hle a a hriat thu a sawi.

Byte of Pu Dina Tlau

MTOA leh MTDA hmalakna hi Mizoram Tipper Assn leh Kolasib District Tipper Assn, Kolasib district chhunga truck driver leh Owner Joint Action Committee leh Kawnpui Truck Driver Association ten MTOA leh MTDA hmalakna hi thlawpin an ding ve nghal a ni.

PWD minister Pu Vanlalhlana chuan Mizoram ei leh bar lakluhna kawngpui ber National Highway NH-6 Kawnpui atanga Khamrang kawng thawm that mek a tlawh a, Pu Vanlalhlana chuan Mipuite harsatna hriaiin Mizoram PWD kawng enkawl ni miah lo ah mawhphurhna an la ni a sawiin mipui leh Lirthei neitute pawhin Sorkar thahnemngaihna hriathiam pui thin se an duh a ti.

Vairengte atanga Sairang inkar National Highway-6 chu NHIDCL kuta awm niin engemaw hna laklawhna avangin Mizoram State sawrkar chuan mipui mamawhna hriain a enkawl lailawk a ni a ti a. Mizoram Sorkarin a enkawl hnu hian a thawh khat nan he kawngpui thawmthat nan nikum khan cheng Nuai 75 sen a lo ni tawha, nikum vek khan NHIDCL kuta awm leh tura ruahman a nih laiin, NHIDCL te hian an lak tak si loh avangin Mizoram Sorkar chuan State pawisa a remchang ang ang pawt khawmin, vawiin thleng hian mipuite mamawhna hriain a enkawl chhun zawm leh rih ta a ni,” a ti.

PWD Minister chuan, National Highway NH -6 thawmthat hna hi ni 20 atang khan a tum hnih nan thawh tan leh a ni a, tun tum ah hian Cheng Nuai 125 ruahman niin february ni 15 a siam zawh tum a ni a, sum ruahman sa hian a daih hmel loh avangin Sorkarah dilbelh leh mek a ni a, ngawrh taka siam mek a ni bawk, a ti.

<><><>

HEALTHY LUNGLEI

Healthy Lunglei District Campaign kal zelah ni 2 kalta chhung khan Lunglei District khawthlang lam, Tlabung RD Block chhunga Tablabagh leh Puankhai khuaahte a thlawna inentirna leh hriselna lam inzirtirna buatsaih a ni.

He programme atan hian Chief Medical Office Lunglei atangin medical team thawk chhuakin, khaw mipuite tan a thlawna inentirna an buatsaih a. Natna inkai chhawn theih loh, non-communicable disease (NCD) chungchang inzirtir niin, NCD awmzia, a natna lan chhuah dan leh natna lo awm chhan bakah, NCD natna laka inven dan tur kawng hrang hrangte zir ho a ni a. NCD vei leh vei loh endikna buatsaih a ni bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



CEC

Chief Election Commissioner Rajiv Kumar chuan Election buaipuitute chu thudik lo thehdarh leh internet lama inbumna do tura ruahmanna tha siam turin a chah. Nimina ni hnih awh Election Commission of India-in conference New Delhi-a a buatsaihah he thu hi a sawi a. Pu Kumar-a chuan technology leh digital lama thiamna thar te inthlanna tha leh rintlak neih kawngah an tangkai hle a ti a. Voter te thinlunga rinna tuh kawngah pawh an pawimawh hle a ni a ti.



MAHARASTRA TRAIN ACCIDENT

Maharashtra-a Jalgaon district-a rel chesuala thi zat chu 13 an tling tawh. Mitthi zinga 10 hi an nihna tihchian tawh a ni a. Puan tawh angin Maharashtra Chief Minister Devendra Fadnavis chuan rel chetsualna thlenga thi an awm chu pawl atih thu sawiin an chhungte hnenah cheng nuai 5 theuh zangna dawmna pek a ni ang a ti a. Hliam tuarte pawh an inenkawlna senso sawrkarin a tum vek dawn tih a puang bawk a ni.



FOREIGN SECRETARY

Sawrkar laipua Foreign Secretary Vikram Misri chu Pathianni khian ni hnih cham turin China-ah a kal dawn. Foreign Secretary-Vice Minister indawrnaah a tel ang a. India leh China inlaichinnaah hmabak la awmte ti hlawhtling turin he inbiakna kaltlang hian hmalak chhunzawm a ni dawn tih External Affairs Ministry chuan thuchhuah siamin a tarlang a. Politics, eibarzawmna leh mipui indawrna kawnga hmasawn zel dan tur an ngaihtuah ang.

